

王維詩集

王維（西元 701～761）

字摩詰，原籍太原祁，其父遷居蒲州，遂為河東人。生於武則天大足元年(西元七〇一年)，卒於唐肅宗上元二年(西元七六一年)。玄宗開元九年(西元七二一年)進士，累官尚書右丞。工草隸，善書畫，蘇軾稱其「詩中有畫，畫中有詩」。詩與孟浩然齊名，稱為王孟。晚年隱居藍田輞川，寄心佛理，詩中時有禪趣和禪境，故有「詩佛」之稱。著有王右丞集。

送別(二首)

下馬飲君酒，問君何所之？君言不得意，歸臥南山陲。
但去莫復問，白雲無盡時。
山中相送罷，日暮掩柴扉。春草明年綠，王孫歸不歸？

送綦毋潛落第還鄉

聖代無隱者，英靈盡來歸。遂令東山客，不得顧採薇。
既至金門遠，孰云吾道非？江淮度寒食，京洛縫春衣。
置酒長安道，同心與我違；行當浮桂棹，未幾拂荆扉。
遠樹帶行客，孤城當落暉。吾謀適不用，勿謂知音稀？

青谿

言入黃花川，每遂青谿水；隨山將萬轉，趣途無百里。
聲喧亂石中，色靜深松裏；漾漾汎菱苳，澄澄決葭葦。
我心素已閒，清川澹如此。請留盤石上，垂釣將已矣。

渭川田家

斜陽照墟落，窮巷牛羊歸。野老念牧童，倚仗候荆扉。
雉鳴麥曲秀，蠶眠桑葉稀。田夫荷鋤至，相見語依依。
既此羨閒逸，悵然吟式微。

西施詠

艷色天下重，西施寧久微？朝為越溪女，暮作吳宮妃。
賤日豈殊眾？貴來方悟稀。邀人傅香粉，不自著羅衣。
君寵益嬌態，君憐無是非；當時浣紗伴，莫得同車歸。
持謝鄰家子，效顰安可希？

【註解】

西施：姓施，名夷光，越王以吳王淫而好色，相于國中，得寧羅山賣薪之女，名西施。教以蓮步，使相國范蠡獻於吳王，吳因以亡國。

艷色：極美的色相。

微：賤。

越溪：即若耶溪。

效顰：西施嘗因心痛而顰，里中醜人見了稱美，亦捧心而顰，而益增其醜。用以喻人的不善學。

洛陽女兒行

洛陽女兒對門居，纔可容顏十五餘。良人玉勒乘驄馬，侍女金盤膾鯉魚。畫閣朱樓盡相望，紅桃綠柳垂簷向。羅帷送上七香車，寶扇迎歸九華帳。

狂夫富貴在青春，意氣驕奢劇季倫。自憐碧玉親教舞，不惜珊瑚持與人。春窗曙滅九微火，九微片片飛花璫。戲罷曾無理曲時，妝成祇是薰香坐。城中相識盡繁華，日夜經過趙李家。誰憐越女顏如玉？貧賤江頭自浣紗。

老將行

少年十五二十時，步行奪得胡馬騎。射殺山中白額虎，肯數鄴下黃鬚兒。一身轉戰三千里，一劍曾當百萬師。漢兵奮迅如霹靂，虜騎崩騰畏蒺藜。

衛青不敗由天幸，李廣無功緣數奇。自從棄置便衰朽，世事蹉跎成白首。昔時飛箭無全目，今日垂楊生左肘。路旁時賣故侯瓜，門前學種先生柳。

蒼茫古木連窮巷，寥落寒山對虛牖。誓令疏勒出飛泉，不似潁川空使酒。賀蘭山下陣如雲，羽檄交馳日夕聞。節使三河募年少，詔書五道出將軍。

試拂鐵衣如雪色，聊持寶劍動星文。願得燕弓射大將，恥令越甲鳴吾君。莫嫌舊日雲中守，猶堪一戰立功勳。

桃源行

漁舟逐水愛山春，兩岸桃花夾古津。坐看紅樹不知遠，行盡青溪不見人。山口潛行始隈隩，山開曠望旋平陸。遙看一處攢雲樹，近入千家散花竹。

樵客初傳漢姓名，居人未改秦衣服。居人共住武陵源，還從物外起田園。月明松下房櫳靜，日出雲中雞犬喧。驚聞俗客爭來集，競引還家問都邑。

平明閭巷掃花開，薄暮漁樵乘水入。初因避地去人間，及至成仙遂不還。
峽裡誰知有人事，世中遙望空雲山。不疑靈境難聞見，塵心未盡思鄉縣。

出洞無論隔山水，辭家終擬長游衍。自謂經過舊不迷，安知峰壑今來變。
當時只記入山深，青溪幾曲到雲林？春來遍是桃花水，不辨仙源何處尋？

輞川閑居贈裴秀才迪

寒山轉蒼翠，秋水日潺湲。倚杖柴門外，臨風聽暮蟬。
渡頭餘落日，墟里上孤煙。復值接輿醉，狂歌五柳前。

山居秋暝

空山新雨後，天氣晚來秋。明月松間照，清泉石上流。
竹喧歸浣女，蓮動下漁舟。隨意春芳歇，王孫自可留。

歸嵩山作

清川帶長薄，車馬去閒閒。流水如有意，暮禽相與還。
荒城臨古渡，落日滿山秋。迢遞嵩高下，歸來且閉關。

終南山

太乙近天都，連山接海隅。白雲迴望合，青靄入看無。
分野中峰變，陰晴眾壑殊。欲投人處宿，隔水問樵夫。

酬張少府

晚年惟好靜，萬事不關心。自顧無長策，空知返舊林。
松風吹解帶，山月照彈琴。君問窮通理，漁歌入浦深。

過香積寺

不知香積寺，數里入雲峰。古木無人徑，深山何處鐘？
泉聲咽危石，日色冷青松。薄暮空潭曲，安禪制毒龍。

送梓州李使君

萬壑樹參天，千山響杜鵑。山中一夜雨，樹杪百重泉。
漢女輸幢布，巴人訟芋田。文翁翻教授，不敢倚先賢。

漢江臨眺

楚塞三湘接，荊門九派通。江流天地外，山色有無中。
郡邑浮前浦，波瀾動遠空。襄陽好風日，留醉與山翁。

終南別業

中歲頗好道，晚家南山陲。興來美獨往，勝事空自知。
行到水窮處，坐看雲起時。偶然值林叟，談笑無還期。

和賈舍人早朝大明宮之作

絳幘雞人送曉籌，尚衣方進翠雲裘。九天閭闔開宮殿，萬國衣冠拜冕旒。
日色纔臨仙掌動，香煙欲傍袞龍浮。朝罷須裁五色詔，珮聲歸向鳳池頭。

奉和聖製從蓬萊向興慶閣道中留春雨中春望之作應制

渭水自縈秦塞曲，黃山舊繞漢宮斜。鸞輿迴出千門柳，閣道迴看上苑花。
雲裡帝城雙鳳闕，雨中春樹萬人家。為乘陽氣行時令，不是宸遊玩物華。

積雨輞川莊作

積雨空林煙火遲，蒸藜炊黍餉東菑。漠漠水田飛白鷺，陰陰夏木囀黃鸝。
山中習靜觀朝槿，松下清齋折露葵。野老與人爭席罷，海鷗何事更相疑？

酬郭給事

洞門高閣靄餘輝，桃李陰陰柳絮飛。禁裡疏鐘官舍晚，省中啼鳥吏人稀。
晨搖玉珮趨金殿，夕奉天書拜瑣闈。強欲從君無那老，將因臥病解朝衣。

鹿柴

空山不見人，但聞人語響。返景入深林，復照青苔上。

竹里館

獨坐幽篁裡，彈琴復長嘯。深林人不知，明月來相照。

相思

紅豆生南國，春來發幾枝。願君多采擷，此物最相思。

雜詩

君自故鄉來，應知故鄉事。來日綺窗前，寒梅著花未？

九月九日憶山東兄弟

獨在異鄉為異客，每逢佳節倍思親。遙知兄弟登高處，遍插茱萸少一人。

渭城曲

渭城朝雨浥輕塵，客舍青青柳色新。勸君更盡一杯酒，西出陽關無故人。

秋夜曲

桂魄初生秋露微，輕羅已薄未更衣。銀箏夜久殷勤弄，心怯空房不忍歸。

酬諸公見過

嗟予未喪，哀此孤生。屏居藍田，薄地躬耕。
歲晏輸稅，以奉粢盛。晨往東皋，草露未晞。
暮看煙火，負擔來歸。我聞有客，足掃荆扉。
簞食伊何，副瓜抓棗。仰廁群賢，皤然一老。

愧無莞簟，班荆席稿。泛泛登陂，折彼荷花。
靜觀素鮪，俯映白沙。山鳥群飛，日隱輕霞。
登車上馬，倏忽雲散。雀噪荒村，雞鳴空館。
還復幽獨，重欷累嘆。

奉和聖製登降聖觀與宰臣等同望應製

鳳辰朝碧落，龍圖耀金鏡。維岳降二臣，戴天臨萬姓。
山川八校滿，井邑三農竟。比屋皆可封，誰家不相慶。
林疏遠村出，野曠寒山靜。帝城雲裡深，渭水天邊映。
佳氣含風景，頌聲溢歌詠。端拱能任賢，彌彰聖君聖。

奉和聖制送不蒙都護兼鴻臚卿歸安西應制

上卿增命服，都護揚歸旆。雜虜盡朝周，諸胡皆自郤。
鳴笳瀚海曲，按節陽關外。落日下河源，寒山靜秋塞。
萬方氛祲息，六合乾坤大。無戰是天心，天心同覆載。

扶南曲(五首)

翠羽流蘇帳，春眠曙不開。羞從面色起，嬌逐語聲來。
早向昭陽殿，君王中使催。
堂上青弦動，堂前綺席陳。齊歌盧女曲，雙舞洛陽人。
傾國徒相看，寧知心所親。
香氣傳空滿，妝華影箔通。歌聞天仗外，舞出御樓中。
日暮歸何處，花間長樂宮。
宮女還金屋，將眠復畏明。入春輕衣好，半夜薄妝成。
拂曙朝前殿，玉墀多佩聲。
朝日照綺窗，佳人坐臨鏡。散黛恨猶輕，插釵嫌未正。
同心勿遽遊，幸待春妝竟。

隴西行

十里一走馬，五里一揚鞭。都護軍書至，匈奴圍酒泉。
關山正飛雪，烽戍斷無煙。

從軍行

吹角動行人，喧喧行人起。笳悲馬嘶亂，爭渡金河水。
日暮沙漠陲，戰聲煙塵裡。盡係名王頸，歸來獻天子。

早春行

紫梅發初遍，黃鳥歌猶澀。誰家折楊女，弄春如不及。
愛水看妝坐，羞人映花立。香畏風吹散，衣愁露沾濕。
玉閨青門裡，日落香車入。遊衍益相思，含啼向彩帷。
憶君長入夢，歸晚更生疑。不及紅檐燕，雙棲綠草時。

早朝

皎潔明星高，蒼茫遠天曙。槐霧暗不開，城鴉鳴稍去。
始聞高閣聲，莫辨更衣處。銀燭已成行，金門儼駟馭。

獻始興公

寧棲野樹林，寧飲澗水流。不用坐梁肉，崎嶇見王侯。
鄙哉匹夫節，布褐將白頭。任智誠則短，守任固其優。
側聞大君子，安問黨與讎。所不賣公器，動為蒼生謀。
賤子跪自陳，可為帳下不。感激有公議，曲私非所求。

贈從弟司庫員外綽

少年識事淺。強學干名利。徒聞躍馬年。苦無出人智。
即事豈徒言。累官非不試。既寡遂性歡。恐招負時累。
清冬見遠山。積雪凝蒼翠。浩然出東林。發我遺世意。
惠連素清賞。夙語塵外事。欲緩攜手期。流年一何駛。

座上走筆贈薛璩慕容損

希世無高節，絕跡有卑棲。君徒視人文，吾固和天倪。
緬然萬物始，及與群物齊。分地依後稷，用天信重黎。
春風何豫人，令我思東溪。草色有佳意，花枝稍含萋。
更待風景好，與君藉萋萋。

贈李頎

聞君餌丹砂，甚有好顏色。不知從今去，幾時生羽翼。
王母翳華芝，望爾昆侖側。文螭從赤豹，萬里方一息。

悲哉世上人，甘此羶腥食。

贈劉藍田

籬間犬迎吠，出屋候荆扉。歲晏輸井稅，山村人夜歸。
晚田始家食，余布成我衣。詎肯無公事，煩君問是非。

贈房盧氏瑄

達人無不可，忘己愛蒼生。豈復少十室，弦歌在兩楹。
浮人日已歸，但坐事農耕。桑榆鬱相望，邑里多雞鳴。
秋山一何淨，蒼翠臨寒城。視事兼偃臥，對書不簪纓。
蕭條人吏疏，鳥雀下空庭。鄙夫心所尚，晚節異平生。
將從海岳居，守靜解天刑。或可累安邑，茅茨君試營。

贈祖三詠

蠨蛸掛虛牖，蟋蟀鳴前除。歲晏涼風至，君子復何如。
高館闌無人，離居不可道。閒門寂已閉，落日照秋草。
雖有近音信，千里阻河關。中復客汝潁，去年歸舊山。
結交二十載，不得一日展。貧病子既深，契闊余不淺。
仲秋雖未歸，暮秋以為期。良會詎幾日，終日長相思。

春夜竹亭贈錢少府歸藍田

夜靜群動息，時聞隔林犬。卻憶山中時，人家澗西遠。
羨君明發去，採蕨輕軒冕。

戲贈張五弟諱(三首)

吾弟東山時，心尚一何遠。日高猶自臥，鐘動始能飯。
領上發未梳，床頭書不捲。清川興悠悠，空林對偃蹇。
青苔石上淨，細草松下軟。窗外鳥聲閒，階前虎心善。
徒然萬像多，澹爾太虛緬。一知與物平，自顧為人淺。
對君忽自得，浮念不煩遣。

張弟五車書，讀書仍隱居。染翰過草聖，賦詩輕子虛。
閉門二室下，隱居十年餘。宛是野人野，時從漁父漁。
秋風自蕭索，五柳高且疏。望此去人世，渡水向吾廬。
歲晏同攜手，只應君與予。

設置守龜兔，垂釣伺游鱗。此是安口腹，非關慕隱淪。
吾生好清淨，蔬食去情塵。今子方豪蕩，思為鼎食人。

我家南山下，動息自遺身。人鳥不相亂，見獸皆相親。
雲霞成伴侶，虛白侍衣襟。何事須夫子，邀予谷口真。

胡居士臥病遺米因贈人

了觀四大因，根性何所有。妄計苟不生，是身孰休咎。
色聲何謂客，陰界復誰守。徒言蓮花日，豈惡楊枝肘。

既飽香積飯，不醉聲聞酒。有無斷常見，生滅幻夢受。
即病即實相，趨空定狂走。無有一法真，無有一法垢。

居士素通達，隨宜善抖擻。床上無氈臥，鍋中有粥否。
齋時不乞食，定應空漱口。聊持數斗米，且救浮生取。

贈裴十迪

風景日夕佳，與君賦新詩。澹然望遠空，如意方支頤。
春風動百草，蘭蕙生我籬。曖曖日暖閨，田家來致詞。
欣欣春還臯，淡淡水生陂。桃李雖未開，萼萼滿芳枝。
請君理還策，敢告將農時。

與胡居士皆病寄此詩兼示學人(二首)

一興微塵念，橫有朝露身。如是睹陰界，何方置我人。
礙有固為主，趣空寧舍賓。洗心詎懸解，悟道正迷津。

因愛果生病，從貪始覺貧。色聲非彼妄，浮幻即吾真。
四達竟何遣，萬殊安可塵。胡生但高枕，寂寞與誰鄰。

戰勝不謀食，理齊甘負薪。予若未始異，詎論疏與親。
浮空徒漫漫，泛有定悠悠。無乘及乘者，所謂智人舟。

詎舍貧病域，不疲生死流。無煩君喻馬，任以我為牛。
植福祠迦葉，求仁笑孔丘。何津不鼓棹，何路不摧輶。

念此聞思者，胡為多阻修。空虛花聚散，煩惱樹稀稠。
滅相成無記，生心坐有求。降吳復歸蜀，不到莫相尤。

奉寄韋太守陟

荒城自蕭索，萬里山河空。天高秋日迴，嘹唳聞歸鴻。
寒塘映衰草，高館落疏桐。臨此歲方晏，顧景詠悲翁。

故人不可見，寂寞平陵東。

林園即事寄舍弟統

寓目一蕭散，銷憂冀俄頃。青草肅澄陂，白雲移翠嶺。
後沔通河渭，前山包鄢郢。松含風裡聲，花對池中影。
地多齊後病，人帶荊州癭。徒思赤筆書，詎有丹砂井。
心悲常欲絕，發亂不能整。青簟日何長，閒門晝方靜。
頽思茅檐下，彌傷好風景。

至滑州隔河望黎陽憶丁三寓

隔河見桑柘，藹藹黎陽川。望望行漸遠，孤峰沒雲煙。
故人不可見，河失復悠然。賴有政聲遠，時聞行路傳。

秋夜獨坐懷內弟崔興宗

夜靜群動息，蟋蟀聲悠悠。庭槐北風響，日夕方高秋。
思子整羽翰，及時當雲浮。吾生將白首，歲晏思滄州。
高足在旦暮，肯為南畝儔。

和使君五郎西樓望遠思歸

高樓望所思，目極情未畢。枕上見千里，窗中窺萬室。
悠悠長路人，曖曖遠郊日。惆悵極浦外，迢遞孤煙出。
能賦屬上才，思歸同下秩。故鄉不可見，雲水空如一。

酬黎居士淅川作

農家真個去，公定隨農否。著處是蓮花，無心變楊柳。
松龕藏藥裏，石唇安茶臼。氣味當共知，那能不攜手。

送魏郡李太守赴任

與君伯氏別，又欲與君離。君行無幾日，當復隔山陂。
蒼茫秦川盡，日落桃林塞。獨樹臨關門，黃河向天外。
前經洛陽陌，宛洛故人稀。故人離別盡，淇上轉驂騑。
企予悲送遠，惆悵睢陽路。古木官渡平，秋城鄴宮故。
想君行縣日，其出從如雲。遙思魏公子，復憶李將軍。

送陸員外

郎署有伊人，居然故人風。天子顧河北，詔書除徵東。
拜手辭上官，緩步出南宮。九河平原外，七國薊門中。
陰風悲枯桑，古塞多飛蓬。萬里不見虜，蕭條胡地空。

無為費中國，更欲邀奇功。遲遲前相送，握手嗟異同。
行當封侯歸，肯訪商山翁。

送宇文太守赴宣城

寥落雲外山，迢遞舟中賞。鏜吹發西江，秋空多清響。
地迴古城蕪，月明寒潮廣。時賽敬亭神，復解罟師網。
何處寄相思，南風搖五兩。

送綦毋潛秘書棄官還江東

明時久不達，棄置與君同。天命無怨色，人生有素風。
念君拂衣去，四海將安窮。秋天萬里淨，日暮澄江空。

清夜何悠悠，扣舷明月中。和光魚鳥際，澹爾蒹葭叢。
無庸客昭世，衰鬢日如蓬。頑疏暗人事，僻陋遠天聰。
微物縱可採，其誰為至公。余亦從此去，歸耕為老農。

奉送六舅歸陸渾

伯舅吏淮泗，卓魯方喟然。悠哉自不競，退耕東皋田。
條桑臘月下，種杏春風前。酌醴賦歸去，共知陶令賢。

送張五歸山

送君盡惆悵，復送何人歸。幾日同攜手，一朝先拂衣。
東山有茅屋，幸為掃荆扉。當亦謝官去，豈令心事違。

齊州送祖三

相逢方一笑，相送還成泣。祖帳已傷離，荒城復愁入。
天寒遠山淨，日暮長河急。解纜君已遙，望君猶佇立。

送繆雲苗太守

手疏謝明主，腰章為長吏。方從會稽邸，更發汝南騎。
按節下松陽，清江響鏜吹。露冕見三吳，方知百城貴。

送從弟蕃游淮南

讀書復騎射，帶劍遊淮陰。淮陰少年輩，千里遠相尋。
高義難自隱，明時寧陸沈。島夷九州外，泉館三山深。

席帆聊問罪，卉服盡成擒。歸來見天子，拜爵賜黃金。
忽思鱸魚膾，復有滄洲心。天寒蒹葭渚，日露雲夢林。

江城下楓葉，淮上聞秋砧。送歸青門外，車馬去駸駸。
惆悵新豐樹，空餘天際禽。

送高適弟耽歸臨淮作

少年客淮泗，落魄居下邳。遨遊向燕趙，結客過臨淄。
山東諸侯國，迎送紛交馳。自爾厭遊俠，閉戶方垂帷。

深明戴家禮，頗學毛公詩。備知經濟道，高臥陶唐詩。
聖主詔天下，賢人不得遺。公吏奉纁組，安車去茅茨。

君王蒼龍闕，九門十二逵。群公朝謁罷，冠劍下丹墀。
野鶴終踉蹌，威鳳徒參差。或問理人術，但致還山詞。

天書降北闕，賜帛歸東菑。都門謝親故，行路日逶遲。
孤帆萬里外，淼漫將何之。江天海陵郡，雲日淮南祠。
杳冥滄洲上，蕩漭無人知。緯蕭或買藥，出處安能期。

送張舍人佐江州同薛璩十韻

束帶趨承明，守官唯謁者。清晨聽銀蚪，薄暮辭金馬。
受辭未嘗易，當是方知寡。清範何風流，高文有風雅。

忽佐江上州，當自潯陽下。逆旅到三湘，長途應百舍。
香爐遠峰出，石鏡澄湖瀉。董奉杏成林，陶潛菊盈把。
範蠡長好之，廬山我心也。送君思遠道，欲以數行灑。

送韋大夫東京留守

人外遺世慮，空端結遐心。曾是巢許淺，始知堯舜深。
蒼生詎有物，黃屋如喬林。上德撫神運，沖和穆宸襟。

雲雷康屯難，江海遂飛沈。天工寄人英，龍袞瞻君臨。
名器苟不假，保厘固其任。素質貫方領，清景照華簪。

慷慨念王室，從容獻官箴。雲旗蔽三川，畫角發龍吟。
晨揚天漢聲，夕捲大河陰。窮人業已寧，逆虜遺之擒。

然後解金組，拂衣東山岑。給事黃門省，秋光正沈沈。
壯心與身退，老病隨年侵。君子從相訪，重玄其可尋。

資聖寺送甘二

浮生信如寄，薄宦夫何有。來往本無歸，別離方此受。
柳色藹春餘，槐陰清夏首。不覺御溝上，銜悲執杯酒。

留別山中溫古上人兄並示舍弟縉

解薛登天朝，去師偶時哲。豈惟山中人，兼負松上月。
宿昔同遊止，致身雲霞末。開軒臨潁陽，臥視飛鳥沒。

好依盤石飯，屢對瀑泉渴。理齊小狎隱，道勝寧外物。
舍弟官崇高，宗兄此削髮。荊扉但灑掃，乘閒當過歇。

觀別者

青青楊柳陌，陌上別離人。愛子遊燕趙，高堂有老親。
不行無可養，行去百憂新。切切委兄弟，依依向四鄰。

都門帳飲畢，從此謝親賓。揮涕逐前侶，含淒動微輪。
車徒望不見，時見起行塵。吾亦辭家久，看之淚滿襟。

別弟縉後登青龍寺望藍田山

陌上新離別，蒼茫四郊晦。登高不見君，故山復雲外。
遠樹蔽行人，長天隱秋塞。心悲宦遊子，何處飛征蓋。

別綦毋潛

端笏明光宮，歷稔朝雲陛。詔刊延閣書，高議平津邸。
適意偶輕人，虛心削繁禮。盛得江左風，彌工建安體。

高張多絕弦，截河有青濟。嚴冬爽群木，伊洛方清泚。
渭水冰下流，潼關雪中啟。荷蓀幾時還，塵纓待君洗。

晦日遊大理韋卿城南別業(四首)

與世澹無事，自然江海人。側聞塵外遊，解驂(車尼)朱輪。
平野照暄景，上天垂春雲。張組竟北阜，泛舟過東鄰。

故鄉信高會，牢體及佳辰。幸同擊壤樂，心荷堯為君。
郊居杜陵下，永日同攜手。仁里靄川陽，平原見峰首。

園廬鳴春鳩，林薄媚新柳。上卿始登席，故老前為壽。

臨當遊南陂，約略執杯酒。歸歟紉微官，惆悵心自咎。

冬中餘雪在，墟上春流駛。風日暢懷抱，山川多秀氣。
彫胡先晨炊，庖膾亦雲至。高情浪海岳，浮生寄天地。

君子外簪纓，埃塵良不啻。所樂衡門中，陶然忘其貴。
高館臨澄陂，曠然蕩心目。淡蕩動雲天，玲瓏映墟曲。

鵲巢結空林，雉雊響幽谷。應接無閒暇，徘徊以躑躅。
紆組上春堤，側弁倚喬木。弦望忽已晦，後期洲應綠。

冬日遊覽

步出城東門，試騁千里目。青山橫蒼林，赤日團平陸。
渭北走邯鄲，關東出函谷。秦地萬方會，來朝九州牧。

雞鳴咸陽中，冠蓋相追逐。丞相過列侯，群公餞光祿。
相如方老病，獨歸茂陵宿。

華岳

西岳出浮雲，積雪在太清。連天凝黛色，百里遙青冥。
白日為之寒，森沈華陰城。昔聞乾坤閉，造化生巨靈。

右足踏方止，左手推削成。天地忽開拆，大河注東溟。
遂為西峙岳，雄雄鎮秦京。大君包覆載，至德被群生。
上帝佇昭告，金天思奉迎。人祇望幸久，何獨禪雲亭。

同廬拾遺過韋給事東山別業

首春休沐維已陪遊及乎是行亦預聞命會無車馬不果斯諾
托身侍云陸，昧旦趨華軒。遂陪鵷鴻侶，霄漢同飛翻。
君子垂惠顧，期我於田園。側聞景龍際，親降南面尊。

萬乘駐山外，順風祈一言。高陽多夔龍，荊山積瓊璠。
盛德啟前列，大賢鐘後昆。侍郎文昌宮，給事東掖垣。

謁帝俱來下，冠蓋盈丘樊。閨風首邦族，庭訓延鄉村。
采地包山河，樹井竟川原。岩端回綺檻，谷口開朱門。

階下群峰首，雲中瀑水源。鳴玉滿春山，列筵先朝暾。

會舞何颯沓，擊鐘彌朝昏。是時陽和節，清晝猶未暄。

藹藹樹色深，嚶嚶鳥聲繁。顧己負宿諾，延頸慚芳蓀。
蹇步守窮巷，高駕難攀援。素是獨往客，脫冠情彌敦。

藍田山石門精舍

落日山水好，漾舟信歸風。探奇不覺遠，因以緣源窮。
遙愛雲木秀，初疑路不同。安知清流轉，偶與前山通。

舍舟理輕策，果然愜所適。老僧四五人，逍遙蔭松柏。
朝梵林未曙，夜禪山更寂。道心及牧童，世事問樵客。

暝宿長林下，焚香臥瑤席。澗芳襲人衣，山月映石壁。
再尋畏迷誤，明發更登歷。笑謝桃源人，花紅復來覲。

崔濮陽兄季重前山興

秋色有佳興，況君池上閒。悠悠西林下，自識門前山。
千里橫黛色，數峰出雲間。嵯峨對秦國，合沓藏荆關。
殘雨斜日照，夕嵐飛鳥還。故人今尚爾，嘆息此頽顏。

李處士山居

君子盈天階，小人甘自免。方隨練金客，林上家絕巘。
背嶺花未開，入雲樹深淺。清晝猶自眠，山鳥時一轉。

丁字田家有贈

君心尚棲隱，久欲傍歸路。在朝每為言，解印果成趣。
晨雞鳴鄰里，群動從所務。農夫行餉田，閨妾起縫素。

開軒御衣服，散帙理章句。時吟招隱詩，或制閒居賦。
新晴望郊郭，日映桑榆暮。陰晝小苑城，微明渭川樹。

揆予宅閭井，幽賞何由屢。道存終不忘，跡異難相遇。
此時惜離別，再來芳菲度。

春中田園作

屋上春鳩鳴，村邊杏花白。持斧伐遠揚，荷鋤覘泉脈。
歸燕識故巢，舊人看新歷。臨觴忽不御，惆悵遠行客。

過李楫宅

閒門秋草色，終日無車馬。客來深巷中，犬吠寒林下。
散發時未簪，道書行尚把。與我同心人，樂道安貧者。
一罷宜城酌，還歸洛陽社。

韋侍郎山居

幸忝君子顧，遂陪塵外蹤。閒花滿岩谷，瀑水映杉松。
啼鳥忽臨澗，歸雲時抱峰。良游盛簪紱，繼跡多夔龍。
詎枉青門道，胡聞長樂鐘。清晨去朝謁，車馬何從容。

飯覆釜山僧

晚知清淨理，日與人群疏。將候遠山僧，先期掃弊廬。
果從雲峰裡，顧我蓬蒿居。藉草飯松屑，焚香看道書。
然燈晝欲盡，鳴磬夜方初。一悟寂為樂，此日閒有餘。
思歸何必深，身世猶空虛。

謁璿上人

上人外人內天。不定不亂。舍法而淵泊。無心而云動。色空無礙。
不物物也。默語無際。不言言也。故吾徒得神交焉。玄關大啟。
德海群泳。時雨既降。春物具美。序於詩者。人百其言。
少年不足言，識道年已長。事往安可悔，餘生幸能養。

誓從斷臂血，不復嬰世網。浮名寄纓佩，空性無羈鞅。
夙承大導師，焚香此瞻仰。頽然居一室，覆載紛萬象。

高柳早鶯啼，長廊春雨響。床下阮家屐，窗前筇竹杖。
方將見身云，陋彼示天壤。一心再法要，願以無生獎。

瓜園詩

余適欲鋤瓜，倚鋤聽叩門。鳴騶導驄馬，常從夾朱軒。
窮巷正傳呼，故人儻相存。攜手追涼風，放心望乾坤。

藹藹帝王州，宮觀一何繁。林端出綺道，殿頂搖華幡。
素懷在青山，若值白雲屯。回風城西雨，返景原上村。
前酌盈樽酒，往往聞清言。黃鸝囀深木，朱槿照中原。
猶羨松下客，石上聞清猿。

自大散以往深林密竹磴道盤曲四五十里至黃牛嶺見黃花川

危徑幾萬轉，數里將三休。回環見徒侶，隱映隔林丘。
颯颯松上雨，潺潺石中流。靜言深溪裡，長嘯高山頭。
望見南山陽，白露靄悠悠。青皋麗已淨，綠樹鬱如浮。
曾是厭蒙密，曠然銷人憂。

新晴野望

新晴原野曠，極目無氛垢。郭門臨渡頭，村樹連溪口。
白水明田外，碧峰出山後。農月無閒人，傾家事南畝。

宿鄭州

朝與周人辭，暮投鄭人宿。他鄉絕儔侶，孤客親僮僕。
宛洛望不見，秋霖晦平陸。田父草際歸，村童雨中牧。

主人東皋上，時稼繞茅屋。蟲思機杼悲，雀喧禾黍熟。
明當渡京水，昨晚猶金谷。此去欲何言，窮邊徇微祿。

早入滎陽界

泛舟入滎澤，茲邑乃雄藩。河曲閭閻隘，川中煙火繁。
因人見風俗，入境聞方言。秋野田疇盛，朝光市井喧。
漁商波上客，雞犬岸旁村。前路白雲外，孤帆安可論。

渡河到清河作

泛舟大河裡，積水窮天涯。天波忽開拆，郡邑千萬家。
行復見城市，宛然有桑麻。回瞻舊鄉國，淼漫連雲霞。

苦熱行

赤日滿天地，火雲成山岳。草木盡焦捲，川澤皆竭涸。
輕絠覺衣重，密樹苦陰薄。莞簟不可近，絺綌再三濯。

思出宇宙外，曠然在寥廓。長風萬里來，江海蕩煩濁。
卻顧身為患，始知心未覺。忽入甘露門，宛然清涼樂。

納涼

喬木萬餘株，清流貫其中。前臨大川口，豁達來長風。
漣漪涵白沙，素鮪如游空。偃臥盤石上，翻濤沃微躬。
漱流復濯足，前對釣魚翁。貪餌凡幾許，徒思蓮葉東。

李陵詠

漢家李將軍，三代將門子。結髮有奇策，少年成壯士。
長驅塞上兒，深入單於壘。旌旗列相向，簫鼓悲何已。

日暮沙漠陲，戰聲煙塵裡。將令驕虜滅，豈獨名王侍。
既失大軍援，遂嬰穹廬恥。少小蒙漢恩，何堪坐思此。
深衷欲有報，投軀未能死。引領望子卿，非君誰相理。

濟上四賢詠(三首)

崔錄事

解印歸田里，賢哉此丈夫。少年曾任俠，晚節更為儒。
遁跡東山下，因家滄海隅。已聞能狎鳥，欲共乘桴。

成文學

寶劍千金裝，登君白玉堂。身為平原客，家有邯鄲娼。
使氣公卿坐，論心遊俠場。中年不得意，謝病客遊梁。

鄭霍二山人

翩翩繁華子，多出金張門。幸有先人業，早蒙明主恩。
童年且未學，肉食驚華軒。豈乏中林士，無人薦至尊。

鄭公老泉石，霍子安丘樊。買藥不二價，著書盈萬言。
息陰無惡木，飲水必清源。吾賤不及議，斯人竟誰論。

過太乙觀賈生房

昔余棲遁日，之子煙霞鄰。共攜松葉酒，俱簪竹皮巾。
攀林遍岩洞，采藥無冬春。謬以道門子，徵為驂御臣。

常恐丹液就，先我紫陽賓。夭促萬途盡，哀傷百慮新。
跡峻不容俗，才多反累真。泣對雙泉水，還山無主人。

燕子龕禪師

山中燕子龕，路劇羊腸惡。裂地競盤屈，插天多峭嶮。
瀑泉吼而噴，怪石看欲落。伯禹訪未知，五丁愁不鑿。

上人無生緣，生長居紫閣。六時自捶磬，一飲常帶索。
種田燒白雲，斫漆響丹壑。行隨拾栗猿，歸對巢松鶴。

時許山神請，偶逢洞仙博。救世多慈悲，即心無行作。

周商倦積阻，蜀物多淹泊。岩腹乍旁穿，澗唇時外拓。

橋因倒樹架，柵值垂藤縛。鳥道悉已平，龍宮為之涸。
跳波誰揭厲，絕壁免捫摸。山木日陰陰，結跣歸舊林。
一向石門裡，任君春草深。

羽林騎閨人

秋月臨高城，城中管弦思。離人堂上愁，稚子階前戲。
出門復映戶，望望青絲騎。行人過欲盡，狂夫終不至。
左右寂無言，相看共垂淚。

偶然作(六首)

楚國有狂夫，茫然無心想。散髮不冠帶，行歌南陌上。
孔丘與之言，仁義莫能獎。未嘗肯問天，何事須擊壤。
復笑採薇人，胡為乃長往。

田舍有老翁，垂白衡門裡。有時農事閒，斗酒呼鄰里。
喧聒茅檐下，或坐或復起。短褐不為薄，園葵固足美。

動則長子孫，不曾相城市。五帝與三王，古來稱天子。
干戈將揖讓，畢竟何者是。得意苟為樂，野田安足鄙。
且當放懷去，行行沒余齒。

日夕見太行，沈吟未能去。問君何以然，世網嬰我故。
小妹日成長，兄弟未有娶。家貧祿既薄，儲蓄非有素。

幾回欲奮飛，踟躕復相顧。孫登長嘯台，松竹有遺處。
相去詎幾許，故人在中路。愛染日已薄，禪寂日已固。
忽乎吾將行，寧俟歲雲暮。

陶潛任天真，其性頗耽酒。自從棄官來，家貧不能有。
九月九日時，菊花空滿手。中心竊自思，儻有人送否。

白衣攜壺觴，果來遺老叟。且喜得斟酌，安問升與斗。
奮衣野田中，今日嗟無負。兀傲迷東西，簞笠不能守。

傾倒強行行，酣歌歸五柳。生事不曾問，肯愧家中婦。
趙女彈箜篌，復能邯鄲舞。夫婿輕薄兒，斗雞事齊主。

黃金買歌笑，用錢不復數。許史相經過，高門盈四牡。
客舍有儒生，昂藏出鄒魯。讀書三十年，腰間無尺組。
被服聖人教，一生自窮苦。

老來懶賦詩，惟有老相隨。宿世謬詞客，前生應畫師。
不能捨余習，偶被世人知。名字本皆是，此心還不知。

寓言(二首)

朱紱誰家子，無乃金張孫。驪駒從白馬，出入銅龍門。
問爾何功德，多承明主恩。斗雞平樂館，射雉上林園。

曲陌車騎盛，高堂珠翠繁。奈何軒冕貴，不與布衣言。
君家御溝上，垂柳夾朱門。列鼎會中貴，鳴珂朝至尊。
生死在八議，窮達由一言。須識苦寒士，莫矜狐白溫。

冬夜書懷

冬宵寒且永，夜漏宮中發。草白靄繁霜，木衰澄清月。
麗服映頽顏，朱燈照華髮。漢家方尚少，顧影慚朝謁。

送康太守

城下滄江水，江邊黃鶴樓。朱闌將粉堞，江水映悠悠。
鐃吹發夏口，使君居上頭。郭門隱楓岸，侯吏趨蘆洲。
何異臨川郡，還勞康樂侯。

送權二

高人不可有，清論復河深。一見如舊識，一言知道心。
明時當薄宦，解薛去中林。芳草空隱處，白雲餘古岑。
韓侯久攜手，河岳共幽尋。悵別千餘里，臨堂鳴素琴。

休假還舊業便使

謝病始告歸，依依入桑梓。家人皆佇立，相候衡門裡。
時輩皆長年，成人舊童子。上堂嘉慶畢，顧與姻親齒。

論舊忽餘悲，目存皆相喜。田園轉蕪沒，但有寒泉水。
衰柳日蕭條，秋光清邑裡。入門乍如客，休騎非便止。
中飲顧王程，離憂從此始。

嘆白髮

我年一何長，鬢髮日已白。俯仰天地間，能為幾時客。
惆悵故山雲，徘徊空日夕。何事與時人，東城復南陌。

別弟妹(二首)

兩妹日成長，雙鬢將及人。已能持寶瑟，自解掩羅巾。
念昔別時小，未知疏與親。今來始離恨，拭淚方殷勤。

小弟更孩幼，歸來不相識。同居雖漸慣，見人猶未覓。
宛作越人語，殊甘水鄉食。別此最為難，淚盡有餘憶。

哭殷遙

人生能幾何，畢竟歸無形。念君等為死，萬事傷人情。
慈母未及葬，一女才十齡。泱泱寒郊外，蕭條聞哭聲。

浮雲為蒼茫，飛鳥不能鳴。行人何寂寞，白日自淒清。
憶昔君在時，問我學無生。勸君苦不早，令君無所成。
故人各有贈，又不及生平。負爾非一途，慟哭返柴荆。

故南陽夫人樊氏挽歌

石筵恩榮重，金吾車騎盛。將朝每贈言，入室還相敬。
疊鼓秋城動，懸旌寒日映。不言長不歸，環佩猶將聽。

夷門歌

七雄雄雌猶未分，攻城殺將何紛紛。秦兵益圍邯鄲急，魏王不救平原君。
公子為嬴停駟馬，執轡愈恭意愈下。亥為屠肆鼓刀人，嬴乃夷門抱關者。
非但慷慨獻良謀，意氣兼將身命酬。向風刎頸送公子，七十老翁何所求。

隴頭吟

長安少年遊俠客，夜上戍樓看太白。隴頭明月迴臨關，隴上行人夜吹笛。
關西老將不勝愁，駐馬聽之雙淚流。身經大小百餘戰，麾下偏裨萬戶侯。
蘇武才為典屬國，節旄落盡海西頭。

燕支行

漢家天將才且雄，來時謁帝明光宮。萬乘親推雙闕下，千官出餞五陵東。
誓辭甲第金門裡，身作長城玉塞中。衛霍才堪一騎將，朝廷不數貳師功。

趙魏燕韓多勁卒，關西俠少何咆勃。報仇只是聞嘗膽，飲酒不曾妨刮骨。

畫戟雕戈白日寒，連旗大旆黃塵沒。疊鼓遙翻瀚海波，鳴笳亂動天山月。

麒麟錦帶佩吳鉤，颯沓青驪躍紫騮。拔劍已斷天驕臂，歸鞍共飲月支頭。
漢兵大呼一當百，虜騎相看哭且愁。教戰雖令赴湯火，終知上將先伐謀。

同崔傅答賢弟

洛陽才子姑蘇客，桂苑殊非故鄉陌。九江楓樹幾回青，一片揚州五湖白。
揚州時有下江兵，蘭陵鎮前吹笛聲。夜火人歸富春郭，秋風鶴唳石頭城。

周郎陸弟為儔侶，對舞前溪歌白紵。曲幾書留小史家，草堂棋賭山陰墅。
衣冠若話外台臣，先數夫君席上珍。更聞台閣求三語，遙想風流第一人。

贈吳官

長安客舍熱如煮，無個茗糜難御暑。空搖白團其諦苦，欲向縹囊還歸旅。
江鄉鯖鮓不寄來，秦人湯餅那堪許。不如農家任挑達，草屨撈蝦富春渚。

故人張諱工詩善易卜兼能丹青草隸頃以詩見贈聊獲酬之

不逐城東游俠兒，隱囊紗帽坐彈棋。蜀中夫子時開卦，洛下書生解詠詩。
藥闌花徑衡門裡，時復據梧聊隱幾。屏風誤點惑孫郎，團扇草書輕內史。
故園高枕度三春，永日垂帷絕四鄰。自想蔡邕今已老，更將書籍與何人。

送崔五太守

長安廩吏來到門，朱文露網動行軒。黃花縣西九折阪，玉樹宮南五丈原。
褒斜谷中不容幘，唯有白雲當露冕。子午山裡杜鵑啼，嘉陵水頭行客飯。

劍門忽斷蜀川開，萬井雙流滿眼來。霧中遠樹刀州出，天際澄江巴字回。
使君年紀三十餘，少年白晳專城居。欲持畫省郎官筆，回與臨邛父老書。

寒食城東即事

清溪一道穿桃李，演漾綠蒲涵白芷。溪上人家凡幾家，落花半落東流水。
蹴鞠屢過飛鳥上，秋千競出垂楊裡。少年分日作遨遊，不用清明兼上巳。

不遇詠

北闕獻書寢不報，南山種田時不登。百人會中身不預，五侯門前心不能。
身投河朔飲君酒，家在茂陵平安否。且此登山復臨水，莫問春風動楊柳。
今人昨人多自私，我心不說君應知。濟人然後拂衣去，肯作徒爾一男兒。

贈裴迪

不相見、不相見來久。日日泉水頭，常憶同攜手。
攜手本同心，復嘆忽分襟。相憶今如此，相思深不深。

青雀歌

青雀翅羽短，未能遠食玉山禾。猶勝黃雀爭上下，唧唧空倉復若何。

黃雀痴

黃雀痴、黃雀痴。謂言青鷖是我兒。
一一口銜食，養得成毛衣。到大啁啾解遊揚，各自東西南北飛。
薄暮空巢上，羈雌獨自歸。鳳凰九雛亦如此，慎莫愁思憔悴損容輝。

新秦郡松樹歌

青青山上松，數里不見今更逢。
不見君，心相憶，此心向君君應識。
為君顏色高且閒，亭亭迴出浮雲間。

榆林郡歌

山頭松柏林，山下泉聲傷客心。
千里萬里春草色，黃河東流流不息。
黃龍戍上游俠兒，愁逢漢使不相識。

問寇校書雙溪

君家少室西，為復少室東。別來幾日今春風。
新買雙溪定何似。餘生欲寄白雲中。

寄崇梵僧

崇梵僧、崇梵僧，秋歸覆釜春不還。
落花啼鳥紛紛亂，澗戶山窗寂寂閒。

峽裡誰知有人事，郡中遙望空雲山。
同比部楊員外十五夜遊有懷靜者季。

承明少休沐。建禮省文書。夜漏行人息。歸鞍落日餘。
懸知三五夕。萬戶千門闢。夜出曙翻歸。傾城滿南陌。

陌頭馳騁盡繁華。王孫公子五侯家。由來月明如白日。
共道春燈勝百花。聊看侍中千寶騎。強識小婦七香車。

香車寶馬共喧闐。個裡多情俠少年。競向長楊柳市北。
肯過精舍竹林前。獨有仙郎心寂寞。卻將宴坐為行樂。
儻覺忘懷共往來。幸沾同舍甘藜藿。

答張五弟

終南有茅屋。前對終南山。終年無客常閉關。終日無心長自閒。
不妨飲酒復垂釣。君但能來相往還。

雪中憶李楫

積雪滿阡陌。故人不可期。長安千門復萬戶。何處躑躅黃金羈。

送李睢陽

將置酒。思悲翁。使君去。出城東。
麥漸漸。雉子斑。槐陰陰。到潼關。

騎連連。車遲遲。心中悲。宋又遠。
周間之。南淮夷。東齊兒。
碎碎織練與素絲。遊人賈客信難持。五谷前熟方可為。下車閉閣君當思。
天子當殿儼衣裳。大官尚食陳羽觴。彤庭散綬垂鳴璫。黃紙詔書出東廂。
輕紈疊綺爛生光。宗室子弟君最賢。分憂當為百闕先。布衣一言相為死。
何況聖主恩如天。鸞聲噦噦魯侯旗。明年上計朝京師。須憶今日斗酒別。
慎忽富貴忘我為。

奉和聖製天長節賜宰臣歌應製

太陽升兮照萬方。開闔闔兮臨玉堂。儼冕旒兮垂衣裳。金天淨兮麗三光。
彤庭曙兮延八荒。德合天兮禮神遍。靈芝生兮慶雲見。唐堯後兮稷契臣。
匝宇宙兮華胥人。盡九服兮皆四鄰。乾降瑞兮坤降珍。

登樓歌

聊上君兮高樓。飛甍鱗次兮在下。俯十二兮通衢。綠槐參差兮車馬。
卻瞻兮龍首。前眺兮宜春。王畿鬱兮千里。山河壯兮咸秦。

舍人下兮青宮。據胡床兮書空。執戟疲於下位。老夫好隱兮牆東。
亦幸有張伯英草聖兮龍騰虯躍。擺長雲兮捩回風。

琥珀酒兮彫胡飯。君不御兮日將晚。秋風兮吹衣。夕鳥兮爭返。
孤砧發兮東城。林薄暮兮蟬聲遠。時不可兮再得。君何為兮偃蹇。

雙黃鵠歌送別

天路來兮雙黃鵠。雲上飛兮水上宿。撫翼和鳴整羽族。
不得已。忽分飛。家在玉京朝紫微。主人臨水送將歸。

悲笳嘹唳垂舞衣。賓欲散兮復相依。幾往返兮極浦。尚裴回兮落暉。
岸上火兮相迎。將夜入兮邊城。鞍馬歸兮佳人散。悵離憂兮獨含情。

贈徐中書望終南山歌

晚下兮紫微。悵塵事兮多違。駐馬兮雙樹。望青山兮不歸。

送友人歸山歌(二首)

山寂寂兮無人。又蒼蒼兮多木。群龍兮滿朝。君何為兮空谷。
文寡和兮思深。道難知兮行獨。悅石上兮流泉。與松間兮草屋。

入雲中兮養雞。上山頭兮抱犢。神與棗兮如瓜。虎賣杏兮收谷。
愧不才兮妨賢。嫌既老兮貪祿。誓解印兮相從。何詹尹兮何卜。

山中人兮欲歸。雲冥冥兮雨霏霏。水驚波兮翠苔靡。白鷺忽兮翻飛。
君不可兮褰衣。山萬重兮一雲。混天地兮不分。樹曖曖兮氛氳。
猿不見兮空聞。忽山西兮夕陽。見東皋兮遠村。平蕪綠兮千里。
眇惆悵兮思君。

魚山神女祠歌(二首)

張茂先神女賦序曰。魏濟北從事弦超。嘉平中。夜夢神女來。自稱天上玉女。姓成公。字智瓊。東郡人。早失父母。天地哀其孤苦。令得下嫁。後三四日一來。即乘輜駟。衣羅綺。智瓊能隱其形。不能藏其聲。且芬香達於室宇。頗為人知。一旦。神女別去。留贈裙衫襦襜。述徵記曰。魏嘉平中。有神女成公智瓊。降弦超。同室疑其有奸。智瓊乃絕。後五年。超使將之洛西。至濟北漁山下陌上。遙望曲道頭。有車馬似智瓊。果是。至洛。克復舊好。唐王勃雜曲曰。智瓊神女。來訪文君。按十道誌云。漁山一名吾山。漢武帝過漁山。作瓠子歌云。吾山平兮巨野溢。是也。

迎神

坎坎擊鼓。漁山之下。吹洞簫。望極浦。女巫進。紛屢舞。陳瑤席。
湛清醑。風淒淒兮夜雨。不知神之來兮不來。使我心兮苦復苦。

送神

紛進舞兮堂前。目眷眷兮瓊筵。來不言兮意不傳。作暮雨兮愁空山。

悲急管兮思繁弦。神之駕兮儼欲旋。倏雲收兮雨歇。山青青兮水潺湲。

白龍渦

南山之瀑水兮。激石高瀑似雷驚。人相對兮。不聞語聲。
翻渦跳沫兮蒼苔濕。蘚老且厚。春草為之不生。獸不敢驚動。
鳥不敢飛鳴。白龍渦濤戲瀨兮。委身以縱橫。王人之仁兮。
不網不釣。得遂性以生成。

宋進馬哀詞

宋進馬者。中書舍人宋公之子也。公無兄弟。子一而已。文則有種。
德亦惟肖。忽疾倏逝。醫不及視。宋公哀之。他人悲之。故為詞曰。
背春涉夏兮。眾木藹以繁陰。連金華與玉堂兮。宮閣鬱其沈沈。
百官並入兮。何語笑之啞啞。君獨靜嘿以傷心。草王言兮不得辭。
我悲減思兮少時。僕夫命駕兮。出閭闔。歷通達。陌上人兮如故。
識不識兮往來。眼中不見兮吾兒。驂紫騮兮從青驪。低光垂彩兮。
恍不知其所之。闢朱戶兮望華軒。意斯子兮候門。忽思瘞兮城南。
心瞽亂兮重昏。仰訴天之不仁兮。家唯一身。身止一子。
何胤嗣之不繁。就單匙而又死。將清白兮遺誰。問詩禮兮已矣。
哀從中兮不可勝。豈暇料餘年兮復幾。日黯黯兮頽擘。
鳥翩翩兮疾飛。邈窮天兮不返。疑有日兮來歸。靜言思兮永絕。
復驚叫兮沾衣。客有弔之者曰。觀未始兮有物。同委蛻兮胡悲。
且延陵兮未至。況西河兮不知。學無生兮庶可。幸能聽於吾師。

資料來源：中國文學網 大家藝文天地 轉載

全集字數 14,585